

## KONTROL MOZIOA

### Arkaitzerrekako isurketari buruzkoa

Garbiñe Alkiza Lopez de Samaniego EH BILDU udal taldeko zinegotziak, Udalbatzaren Organo Araudiko 98. artikulua oinarri, mozio hau aurkezten du, Udalbatzan azter dadin. Mozioa 2021eko azaroaren 15ean Garapen eta Lurralde Planifikazio Batzordean aurkeztutako interpelazioaren ondorioa da.

## JUSTIFIKAZIOA

2020ko maiatzaren 7an isurketa larria izan zen Arkaitzerrekan, Zubietako errauskailuaren inguruan. Aingirak eta tamaina txikiagoko beste arrain batzuk hil ziren, eta hasiera batean José Ignacio Asensio Gipuzkoako Ingurumen diputatuak gertaeraren eta aipatutako azpiegituraren arteko edozein harreman ukatu bazuen ere, handik gutxira jakinarazi zen Gipuzkoako Hondakinen Partzuergoak (GHK) espediente bat ireki ziola Ekondakin enpresa emakidadunari, amoniakoaren ihesagatik. Ertzaintzak eta Guardia Zibilak espediente bana ireki zuten eta 2020ko uztailean Fiskaltzak kasua epaitegietara eramatea erabaki zuen. Joan den apirilean, Donostiako Instrukzioko 5. Epaitegiak auto bat eman zuen, eta bertan adierazi zuen Partzuergoa ikertzen ari zela.

Guardia Zibilaren Ingurumen Unitate Zentral Operatiboaren (UCOMA) txosteneko datuen arabera, istripu kimiko larritzat jotzen du gertatutakoa. Dokumentu horretatik ondoriozta daitekeenez, errauskailuko amonio-tanga kargatzeko prozesuan segurtasun-upeltxoan amoniakoa isuri zen. Ikerketaren arabera, egoera horren aurrean, instalazioaren arduradunak ur-kantitate izugarriak botaz (2.302.992 litro) amoniakoaren isuriaren aztarnak ezabatzen saiatu ziren.

Arkaitzerrekan zeuden arrainen lau espezieak desagertzeaz gain, isurketak “tamaina handiko animaliei” ere eragin zien.

**EH Bildu talde politikoa**

Grupo político EH Bildu

Ijentea, 1 - 20003 Donostia  
Tel. 943481027 eh\_bildu@donostia.eus-- [www.donostia.ehbildu.eus](http://www.donostia.ehbildu.eus) -

Ikerketak erakutsi duenez, hildako aingira baten ehunean klaroalkano-maila oso altuak aurkitu dira. 2004az geroztik debekatutako substantzia bat da klaroalkanoa, oso toxikoa eta kantzerigenoa; zeina, isurketa ikertu duten ikertzaileek —zientzialari kimikoez aholkatutako Guardia Zibilaren perituek— uste duten jatorria plastikoen, gomen eta beste hondakin batzuen errausketan egon daitekeela.

Gogorarazi behar dugu Arkaitzerreka ia erabat Donostian dagoela, azken zati txiki batean izan ezik, non tarte horretan Usurbilgo lurraldea zeharkatzen duen Oriara isuri aurretik. Hortaz, azaroaren 15eko batzordeetan istripu honen aurrean Donostiako Udal Gobernuak jarraitutako pausuengatik interpelatu genuen zinegotzi ordezkaria.

Zinegotzi arduradunak Gipuzkoako Foru Aldundiak eta GHKk hartutako neurriei eta erreka leheneratzeko egindako lanei buruzko azalpenak eman zizkigun, baina ez Donostiako Udal Gobernuak ingurumen eraso honen aurrean hartuko dituen neurri eta erreklamazioei buruzko azalpenik.

Arkaitzerrekan gertatutakoa ingurumenaren aurkako istripu larria izan da, eta lehena eta bakarra izan ez dela jakin dugu. Hortaz, berriro gertatuko ez dela bermatu beharko genuke, eta horretarako ezinbestekoa da Donostiako Udalak dagozkion neurriak hartzea ingurumena eta gu guztion osasuna babesteko.

Horiek horrela, honako hau da behean sinatzen duen zinegotziak aurkeztutako **KONTROL MOZIOA**:

- Donostiako Udalbatzak hertsiki eskatzen dio Udal Gobernuari ingurumen istripua eragin duenaren arduraduna identifikatzeko bidea has dezan, orain arte gertatutako isurketa kutsakorrek berriro ez gertatzeko, eta gertatutako azken isurketaren aurrean, Udala ingurumen-delituaren kausan agertzea.

**EH Bildu talde politikoa**

Grupo político EH Bildu

Ijentea, 1 - 20003 Donostia  
Tel. 943481027 eh\_bildu@donostia.eus-- [www.donostia.ehbildu.eus](http://www.donostia.ehbildu.eus) -

- Donostiako Udalbatzak hertsiki eskatzen dio Udal Gobernuari Zubietan izandako isurketa kutsakorren ondorioz Arkaitzerrekan sortutako ingurumen kalteengatik dagokion arduradunari kalte ordainak eskatzeko, eta beharrezkoa balitz epaitegietan ere salaketa jartzeko.
- Donostiako Udalbatzak hertsiki eskatzen dio Udal Gobernuari Zubietan izandako isurketa kutsakorrek sortutako kalteak konpontze aldera, Arkaitzerreka leheneratzeko lanetan parte hartzeko.

Donostian, 2021eko azaroaren 19an



Garbiñe Alkiza Lopez de Samaniego  
EH BILDU udal taldeko zinegotzia